



Sud Bosne i Hercegovine
Суд Босне и Херцеговине

Broj: S1 3 P 038080 20 Iž
Sarajevo, 23.10.2020. godine

Sud Bosne i Hercegovine, u drugostepenom vijeću sastavljenom od sudija Srete Crnjaka kao predsjednika vijeća, Vesne Trifunović i Dinke Bešlagić Čovrk kao članova vijeća, odlučujući o žalbi Nine Šilića sa boravkom u Njemačkoj 14167 Berlin Platz des 4.Juli 8, koji osporava odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 23.10.2020. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020 .godine po podnesenim prijavama do 01.09.2020.godine jer nisu ispunjeni uslovi propisani odredbom člana 3.15 stav 1, 2 i 3 Izbornog zakona Bosne i Hercegovine.

Navedenom odlukom odbijena je prijava Nine Šilića koji je blagovremeno izjavio žalbu u kojoj je naveo da je dostavio urednu prijavu i stoga predlaže da mu se glasački materijal dostavi na adresu u Njemačkoj.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana jer je žalitelj uz prijavu za glasanje izvan BiH nije dostavio zakonom propisani dokaz o identitetu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Pravilna je i zakonita odluke Centralne izborne komisije BiH kojom je odbijena prijava Nine Šilića za upis u izvod iz Centralnog biračkog spisa za glasanje izvan

Bosne i Hercegovine jer imenovani uz prijavu nije dostavio važeći identifikacioni dokument. Time nisu ispunjeni uslovi propisani članom 3.15. stav 1 Izbornog zakona (Sl. glasnik BiH br.23/01 sa izmjenama) da se državljanin Bosne i Hercegovine koji privremeno živi u inostranstvu, nađe na izvodu Centralnog biračkog spiska za glasanje van zemlje budući da član 5.12 stav 4 istog zakona propisuje da je važeća lična isprava za birače, lična karta, pasoš i vozačka dozvola.

Centralna izborna komisija Bosne i Hercegovine u osporavanom rješenju pravilno je utvrdila činjenicu da žalitelj uz prijavu za glasnja izvan BiH nije dostavio ni jedan važeći zakonom propisani dokument o identitetu jer je uz prijavu izostalo dostavljanje bilo kojeg dokaza o identitetu.

Proizilazi da je prilikom odlučivanja CIK BiH pravilno primjenio zakonsku odredbu koja propisuje uslove za prihvatanje prijave za glasanje van BiH. Predmetnom odlukom žalitelju nije uskraćeno biračko pravo jer se, shodno odredbi člana 3.16 stav 2 citiranog zakona, nalazi u izvodu iz Centralnog biračkog spiska za glasanje u osnovnoj izbornoj jedinici u kojoj ima prebivalište u Bosni i Hercegovini.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
SUDIJA**

Sreto Crnjak